


# LEABHAIR NUA



## Pictiúr: Radharc:

Páid agus Bríd ag teacht abhaile ón scoil; ansin iad ag taispeáint a gcuid leabhar do Mhamaí; Nóirín; leabhar Béarla, leabhar Gaeilge, píosaí airgid (Ceacht 37), caoga pingin, múinteoir, comhartha ceiste, leabhar a bhfuil pictiúir dheasa ann le cur i lámha Nóirín (a lámha salach); Mamaí ag cur clúdaigh ar leabhar le cur sa chiorcal cainte de réir mar a oireann.

Gníomhartha agus geáitsíocht a dhéanamh de réir mar a bhíonn gá leo.

## CÉIM 1. CLOISTEÁIL AGUS AITHINT

### Cuntas Reatha

Tháinig na leanaí abhaile ón scoil. Bhí áthas mór orthu. Bhí leabhair nua acu.

### Agallamh

- BRÍD: Fuair mé mo leabhar Béarla inniu.  
 MAMAÍ: An bhfuair tusa do leabhar Gaeilge, a Pháid?  
 PÁID: Ní bhfuair. Caithfidh mé an t-airgead a thabhairt don mhúinteoir amárach.  
 MAMAÍ: Tabharfaidh mé caoga pingin duit chun é a cheannach.  
 NÓIRÍN: Is deas iad na pictiúir atá sa leabhar seo.  
 BRÍD: Fág ar an mbord é, a Nóirín. Níl do lámha glan go leor.  
 MAMAÍ: Caithfidh mé clúdach a chur air anocht.

## CÉIM 2. AITHRIS

## CÉIM 3. ATHRÁ Ó SPREAGTHAIGH

(a) Spreagthaigh shúl (mar atá i gCéim 1);

(b) Spreagthaigh chluas:

Cé a tháinig abhaile ón scoil?

Bhí brón orthu!

Cad a bhí acu?

Céard a fuair tusa, a “Bhríd”?

Ceist ar Pháid, a “Mhamaí”.

Freagair í, a “Pháid”.

Céard a deir tú faoin airgead?

Cá mhéad a thabharfaidh tú dó, a “Mhamaí”?

Céard a deir tusa faoi na pictiúir, a “Nóirín”?

Labhair léi, a “Bhríd”.

Cén fáth a ndeir tú sin?

Céard a dhéanfaidh tusa leis an leabhar, a “Mhamaí”?

#### CÉIM 4. CLEACHTADH MÚNLAÍ AGUS FOCLÓRA

1. *Tháinig* na leanaí abhaile.  
(*anois, aréir, amárach*; níor, ar?: *aréir*; ní, an?: *amárach*).
2. Bhí leabhair nua *acu*.  
(*mise, tusa, eisean, ise, sinn, Seán, na páistí*).
3. *Fuair* mé mo leabhar Béarla.  
(*gach lá, amárach*; ní, an?: *inné*; ní, an?: *amárach*).
4. Trí gheáitsíocht agus trí mhím na páistí a mhealladh chun an múnla seo a chríochnú ar bhealaigh éagsúla:  
“Caithfidh *mé*  
(*tú, sé, sí, siad*) . . .”

#### CÉIM 5. SAORCHOMHRÁ CRUTHAITHEACH

1. Aithris ar an mbunchomhrá.
2. Scéal a chumadh:  
Strac Nóirín an leabhar.
3. Cur síos ó pháistí ar na leabhair go léir atá acu:  
*nó*  
Dráma—páiste ag ceannach a chuid leabhar nua ón múinteoir.

4. Comhrá faoin bpictiúr agus ceisteanna ó pháistí ar a chéile agus ar an múinteoir.

5. Gnóthaí Ealaíne:

Pictiúir, e.g. mise agus mo leabhar nua; na boinn airgid a bhí agam chun díol as an leabhar Gaeilge, as an leabhar Béarla, etc., clúdach (gréas deas ar pháipéar) don leabhar, etc.

Rann Ceoil (An ceol ar théip)

#### I

Tháinig na leanaí abhaile ón scoil  
Fuair siad leabhair nua, nach iad a bhí go deas?  
Bhí leabhar nua ag Bríd, is bhí leabhar nua ag Páid  
Nach orthu a bhí an t-áthas ag teacht abhaile leo.

#### II

Leabhar Béarla ag Bríd, leabhar nua deas  
Leabhar Gaeilge ag Páid, leabhar nua deas  
Leabhar deas le pictiúr ag Nóirín bheag  
Nach orthu a bhí an t-áthas, ag teacht abhaile leo?